

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**  
**DARIPADA : DATIN MASTURA BINTI TAN SRI DATO'**  
**MOHD YAZID [ KUALA KANGSAR ]**  
**TARIKH : 20.3.2017 (ISNIN)**

**Datin Mastura Binti Tan Sri Dato' Mohd Yazid [ Kuala Kangsar ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah Kementerian mahu melaksanakan program tanpa beg plastik dan polisterin dengan menggantikannya dengan pembungkus bahan "biodegradasi" kepada seluruh negara seperti yang telah dilakukan di beberapa negeri seperti Melaka dan Wilayah Persekutuan.

## **JAWAPAN:**

**Tuan Yang Di-Pertua,**

Objektif utama Kempen Kurangkan Penggunaan Beg Plastik yang diadakan pada setiap hari Sabtu adalah untuk meningkatkan kesedaran pengguna terhadap kepentingan menjaga alam sekitar. Kerajaan sentiasa berusaha untuk menyediakan persekitaran yang bersih dan selamat kepada semua lapisan masyarakat. Kempen ini adalah satu daripada usaha kerajaan dalam memastikan alam sekitar terpelihara dengan meminimumkan penggunaan sumber asli, bahan toksik dan pengeluaran bahan buangan.

Buat masa ini, Kementerian hanya menjalankan kempen tersebut secara sukarela melibatkan pasaraya yang ingin menyertainya dan tidak mewajibkan semua peniaga untuk menggantikan pembungkusan plastik sedia ada dengan pembungkus bahan biodegradasi ke seluruh negara. Oleh itu, sekiranya terdapat Kerajaan negeri yang melaksanakan peraturan untuk mewajibkan penggunaan pembungkus bahan biodegradasi, ianya adalah tertakluk kepada pemakaian undang-undang pihak berkuasa tempatan dan peraturan di peringkat negeri masing-masing seperti yang telah dilaksanakan di negeri Melaka dan Wilayah Persekutuan.

Kesimpulannya, fokus jangka panjang kerajaan menerusi kempen ini adalah supaya rakyat dapat hidup dalam keadaan yang selesa dan mempunyai kualiti hidup yang lebih baik tanpa menggugat keperluan generasi akan datang.